

आकाशवाणी

1 झारखंड च पैहले चरण दे विधानसभा चुनावं लेई तैयारियां पूरी।

2 लोक सेवा प्रसारण ध्याड़ा-2024 आकाशवाणी भवन च मनाया गेआ।

3 पब्लिक सेक्टर बैंकें 2024-25 दे पेहले 6 म्हीनें च 11 फीसदी बरे दरान बढ़ोतरी कन्नै मजबूत प्रदर्शन कीता। कुल कारोबार 236 अशारिया 06 लकख करोड़ रपे रेआ।

4 भारत ते रूस नै दालें दे बपार च सहयोग बधाने उप्पर चर्चा कीती।

5 चालू माली बरे दा शुद्ध परतकख टैक्स कलेक्शन अर्जे तोड़ी 15 इशारिया 4-1 फीसदी दे बाद्दे दे कन्नै 12 लकख 10 जहार करोड़ कोला उप्पर पुज्जी गेदी ऐ।

<><><><><><>

Jharkhand-Election

झारखंड च पैहले चरण दे विधानसभा चुनावं लेई सारे इंतजाम कीते गेदे न। इस चरण च कल 43 क्षेत्रें च मतदान होडन। मतदान पार्टियें गी अपने-अपने इलाकें च भेजेआ जा'रदा ऐ। 225 संवेदनशील बूथें पर मतदान पार्टियां पैहले गै पुज्जी चुकी दियां न। भारतीय वायु सेना दे हेलीकाप्टरें गी इनें मतदान अधिकारियें ते चुनावं सरबंधी सामग्री गी लेई जाने लेई सेवा च लाया गेदा ऐ।

<><><><><><>

PSBD

अज्ज लोकसेवा प्रसारण ध्याड़ा मनाया जा करदा ऐ। 1947 च दिल्ली च आकाशवाणी दे स्टूडियो च राष्ट्रपिता महात्मा गांधी होर इक्क बारी आए दे हे ओदे चेतें च हर बरे एह ध्याड़ा मनाया जंदा ऐ। राष्ट्रपिता होरें उनें विस्थापित लोकें गी संबोधित कीता हा जेड़े बंटवारे दे मगरा हरियाणा दे कुरूक्षेत्र च अर्जी तौर पर रवा करदे हे। आकाशवाणी दे संवाददाता नै रिपोर्ट दिती ऐ जे 77 बरे पैहलें अज्जै दे दिन देयाली ही जेल्ले महात्मा गांधी होर विस्थापित लोकें कन्नै मिलन हरियाणा दे कुरूक्षेत्र नेई जाई सके हे। उनें रेडियो राएं अपना सनेहा भेजने दा फैसला कीता हा। 1947 बरे च अज्जे दे ध्याड़े महात्मा गांधी हुंदा आकाशवाणी परा एह पैहला ते खीरी सिद्धा प्रसारण हा। इस मौके पर अज्ज आकाशवाणी दिल्ली दे अहाते पर इक्क खास प्रोग्राम लोआया गेआ।

<><><><><><>

Karnatka-By Polls

कर्नाटक च कल चन्ना पटना, सिगांव ते संदूर च होने आहले विधानसभा उपचुनां लेई तैयारियां जारी न। चन्नापटना च मकाबला केंद्री मंत्री ते जे.डी (एस) दे वरिष्ठ नेता एच.डी कम्मा स्वामी दे जागत निखिल कम्मारा स्वामी ते बीजेपी थमां कांग्रेस च शामिल होए दे सी.पी योगेश्वर हुंदे बिच्च मन्नेआ जा रदा ऐ। शिगांव च मकाबला बीजेपी दे सांसद बसवराज बोम्माई दे पुत्र भरत बोम्माई ते कांग्रेस दे मेदवार यासिर अहमद खान पठान दे बिच्च मन्नेआ

जा'रदा ऐ। संदूर च कांग्रेस दे सांसद ई-तुक्काराम इस खेत्र थमां विधायक हे ते पार्टी ते उंदी लाड़ी अन्नपूर्णा गी इस सीट लेई चुनेआ ऐ।

<><><><><><>

Meghwal-Book Release

कनून ते न्याय मंत्री अर्जुन राम मेघवाल होरें अज्ज नर्मी दिल्ली च केरल दे राज्यपाल अरीफ मोहम्मद खान ते पच्छिम बंगाल दे राज्यपाल डॉ. सी.वी आनंद बोस हुंदी मौजूदगी च मां मदर शीर्षक आहली कताब दा विमोचन कीता। एह कताब केरल दे राज्यपाल हुंदे अडिशनल सेक्रेटरी डॉ. देवेन्द्र कुमार धोदावत होरें लिखी दी ऐ। इस कताब च मां दे बारे च कविता हिंदी ते अंग्रेजी भाशाएं च लिखी गेदियां न।

<><><><><><>

Hardeep Puri ETS

केंद्री पेट्रोलियम ते प्राकृतिक गैस दे मंत्री हरदीप सिंह पुरी होरें आखेआ ऐ जे बायो फ्यूल बलेंडिंग कन्नै भारत गी आयात खर्चे च 91 जहार करोड़ रुपें दी बचत होई सकदी ऐ ते इस बचत कन्नै राई-बाई क्षेत्र गी फायदा होग। बेंगलुरु च 27में उर्जा प्रौद्योगिकी शिखर सम्मेलन दा उद्घाटन करदे होई उनें दस्सेआ जे भारत जेव ईंधन मिश्रण च वैश्विक स्तर उप्पर दुआ थाहर हासल करा'रदा ऐ ते अगले बरे तगर समें शा पैहले 20 फीसदी जैव ईंधन मिश्रण दा लक्ष्य हासल करने दी बचा उप्पर ऐ। मंत्री होरें इस गल्ला पर जोर भरेआ ऐ जे जियां-जियां

भारती रिफाइनरी ग्रीन उर्जा च बदलाव करा'रदी ऐ। उआं देश अपने ग्रीन हाइड्रोजन दे लक्ष्ये दी बक्खी अग्गे बधै करदा ऐ।

<><><><><><>

Public Sector Bank

पब्लिक सेक्टर बैंके 2024-25 दे पैहले 6 म्हीने च 11 फीसदी बरे दरान बढ़ोतरी कन्ने मजबूत प्रदर्शन कीता ऐ। कुल कारोबार 236 अशारिया 06 लक्ख करोड़ रपे दा रेआ। वित्त मंत्रालय नै आखेआ जे पिछले किश बरें च आखेआ ऐ जे पिछले किश बरें च बैंकिंग च बड्डे सुधार कीते गेन। इंदे च उत्कृष्टता गी बधाना, Enactment of insolvency and Bankruptcy code ते इक मजबूत शासन ढांचे गी लागू करना शामिल ऐ।

<><><><><><>

India Russia Agriculture

रूस दे कृषि मंत्रालय दे उपमंत्री Maxim Titov हुंदी अगुवाई च इक प्रतिनिधिमंडल नै कल उपभोक्ता मामले दे मैहकमें दे सचिव निधि खरें हुंदे कन्ने मलाटी कीती ते दालें दे बपार च सहयोग बधाने उप्पर चर्चा कीती। रूस पिछले किश बरें च भारत दे मसूर ते पीले मटर दे आयात दा इक बड्डा स्रोत दे तौरा पर उभरिए सामने आया ऐ। इनें दऊं दालें दे अलावा रूस अपनी दालें दे उत्पादन च विविधता आहनने पर बी विचार करा'रदा ऐ तां जे उड़द ते तूर गी बी शामिल कीता जाई सकै।

<><><><><><>

MOC-Call Dropping

संचार मंत्रालय काल ड्राप कन्नै उपभोक्ताएं गी पेश औने आहली समस्याएं
उप्पर कम्म करा'रदा ऐ। सूत्रें मूजब मंत्रालय इक बरे च 4 बारी दी बजाय हर
म्हीने सेवा दी गुणवत्ता दी निगरानी करा'रदा ऐ। सूत्रें एह बी दस्सेआ ऐ जे
सरकार लेटेंस पैरामीटर्स गी अंतरराश्ट्री स्तर उप्पर सख्ती कन्नै पालन करने दी
कोशश करा'रदी ऐ।

<><><><><><>

PM-Billiards

प्रधानमंत्री नरेंद्र मोदी होरें पंकज अडवानी होरें गी विश्व विलियाड्स चैंपियन्स
2024 बनने उप्पर मबारकबाद दिती। अपने इक स्नेह च मोदी होरें उंदे समर्पण,
जज्बे ते प्रतिबद्धता दी सराहना कीती। प्रधानमंत्री होरें आखेआ जे उंदी सफलता
औने आहले एथलीटें गी प्रेरित करदी रौहग।

<><><><><><>

GOC-Visit

फौज दी उत्तरी कमान दे अध्यक्ष लेफ्टिनेंट जनरल एम.वी सुचिंद्र कुमार होरें जम्मू दे
नगराटा च व्हाईट नाइट कोर दा दौरा लाया ते संचालन मुतल्लक तैयारियें दा जायजा
लैता। उधमपुर आधारित उत्तरी कमान दे जनरल आफिसर कमांडिंग इन चीफ हुंदा 16
कोर दे सदर दफ्तर दा एह दौरा ओल्लै लग्गा ऐ जेल्ले किश्तवाड़ जिले दे दूर-दरेडे
जंगली इलाके च आतंक विरोधी कार्रवाइयें च तेजी आई गई ऐ। पिछले 5एं दिनें च 2

बकख-बकख आतंकी घटनाएं च इत्थें इक जूनियर कमीशनर अफसर ते दो वीडिजी सदस्य शहीद होई गए हे। उत्तरी कमान नै एक्स पर इक्क पोस्ट च आखेआ ऐ जे लेफ्टिनेंट जनरल कुमार होरें व्हाईट नाइट कोर दा दौरा लाया ते संचालन तैयारियें दा जायजा लैता।

<><><><><><>

Pradhan-workshop

केंद्री शिक्षा मंत्री धर्मेंद्र प्रधान होरें अज्ज आखेआ ऐ जे 2047 बरे तोड़ी मुल्खें गी विकसित बनाने दा सुखना पूरा करने लेई शिक्षा गै इक्कला रस्ता ऐ। मंत्री होर अज्ज नर्मी दिल्ली च राज्यें ते केंद्र शासित इलाकें दे उच्च ते तकनीकी शिक्षा सरबंधी मैहकमे दे सचिवें दी राश्ट्री कार्यशाला च भाशण देआ करदे हे। मंत्री होरें शिक्षा दे क्षेत्र च पंज महत्वे आहले पैहलुएं च सुधार करने पर जोर पाया। एह पैहलु न बुनियादी ढांचा, नेतृत्व, पाठ्यक्रम, मते विशयें पर शोध ते शिक्षा इदारे च उत्साह ते उर्जा कन्नै भरोचे दा जीवन। श्री प्रधान होरें नुमाइंदें गी राज्यें ते केंद्र शासित राज्यें च राश्ट्रीय शिक्षा नीति 2020 गी लागू करने लेई गैइयां पुट्टने लेई आखेआ। उनें हर राज्य दी खास जरूरतें पर आधारित पाठ्यक्रम तैयार करने दा बी सुझा दित्ता।

<><><><><><>

Rajnath-Defence

रक्षामंत्री राजनाथ सिंह होरें युद्ध दे बदलोदे हालात ते सुरक्षा सरबंधी खतरें कन्नै असरदार ढंगै कन्नै निब्बड़ने लेई महत्वै आहली मुआफक रक्षा रणनीतियें

पर जोर दिता ऐ। मंत्री होरें नमीं दिल्ली च दिल्ली रक्षा गल्लबात उद्घाटनी मसारोह च भाशण दिंदे होई आखेआ जे अनुकूल रक्षा सरिस्ता छड़ा इक्क रणनीतिक विकल्प नेई ऐ, सगुआं इक्क जरूरत ऐ। उनें आखेआ जे इस बारै मुखै दा नजरिया लचीलेपन, नमीं काइडें ते दब्दीली पर आधारित होना लोइचदा ऐ। उनें आखेआ जे सरकार नै राष्ट्रीय सुरक्षा खलाफ सूचना युद्ध दे खतरे दा मुकाबला करने लेई मुआफक रक्षा रणनीतियां अपनाने दा धेइया कीते दा ऐ।

<><><><><><>

Mock-Drill Reasi

जिला पुलस रियासी नै एसओजी, सी.आर.पी.एफ, जी.आर.पी., एस.डी.आर.एफ, वी.डी.जी, सिविल प्रशासन, अग्ग स्हालने ते आपात हालात च कम्म करने आहिलयें टीमें ते मेडिकल टीमें कन्नै रलियै अज्ज अभ्यास आहली कारवाई कीती। जम्मू-कश्मीर पुलस मताबक उधमपुर-श्रीनगर-बारामूला रेलवे लिंक परियोजना पर रियासी जिले च चिनाब पुल पर एह मॉक ड्रिल कीती गई। चिनाव नदी पर 359 मीटर दी उंचाई पर इस पुल दा निर्माण कीता गेदा ऐ। एह पुलस Eiffel Tower कोला तकरीबन 35 मीटर उच्चा ऐ। एहदे कोला पैहले रेलवे मंत्रालय नै बक्ख-बक्ख थाहरें पर इक्क सार्वजनिक सेवा प्रोग्राम च सब्बनें कोला मते लोकें दी मौजूदगी लेई 'लिम्का बुक ऑफ रिकार्ड्स' च थाहर बनाई ही। रेलवे मंत्रालय नै 26 फरवरी 2024 गी इक्क प्रोग्राम आयोजित कीता हा जेदे च दो जहार 140 थाहरें पर 40 लक्ख 19 जहार 516 लोक शामिल होए हे।

एह प्रोग्राम प्रधानमंत्री नरेंद्र मोदी हुंदे आसेआ रेलवे पुलें दे उद्घाटन ते रेलवे स्टेशनें दा नीह पत्थर रक्खने लेई लोआया गेआ हा।

<><><><><><>

Direct Tax Collection

चालू माली बरे दा शुद्ध परतक्ख टैक्स दी कलेक्शन अर्जे तोड़ी 15 इशारिया 4-1 प्रतिशत दे बाद्दे दे कन्नै 12 लक्ख 10 जहार करोड़ कोला उप्पर पुज्जी गेदी ऐ। परतक्ख टैक्स सरबन्धी केंद्री बोर्ड नै जानकारी दिती ऐ जे इस बरे पैहली अप्रैल कोला लेइए 10 नवंबर तोहड़ी दी अवधि दौरान रिफंड दा स्हाब बरोबर करने कोला पैहले सकल परतक्ख कर संग्रह 21 इशारिया 2 प्रतिशत बधिए 15 लक्ख करोड़ रपे कोला मता होई गेदा ऐ। इस अर्से दौरान 2 लक्ख 91 जहार करोड़ रपे दे रिफंड जारी कीते गेन जेहड़े जे पिछले बरे दी इस्से अवधि च जारी रिफंड दे स्हाबे 53 प्रतिशत मते न। केंद्री परतक्ख टैक्स बोर्ड नै आखेआ ऐ जे कारपोरेट टैक्स च बी 5 लक्ख 10 जहार करोड़ रपे दी टैक्स वसूली कीती गई जेड़ी कि पिछले बरे कीती गेदी 4 लक्ख 79 जहार करोड़ रपे कोला ममूली जनेई बद्द ऐ।

<><><><><><>

Rana-Forest

पर्यावरण ते जंगलात मंत्री जावेद अहमद राणा होरें कल जंगलात सरबन्धी मैहकमे दे सीनियर अधिकारियें गी जंगलात मतल्लक संसाधनें दी हिफाजत ते पर्यावरण गी बचाने आहले बक्खी, सहभागिता आहला नजरिया अपनाने दा आहवान कीता जेदे च मकामी समुदायें दी बी शमूलियत होऐ। मंत्री होरें जंगल

जाईं गी बचाने लेई जंगलात मतल्लक अधिकारें आहले कनून गी लागू करने, तेजी कन्ने भर्तियां करने, इमारती लकड़ी दी तस्करी दी निगरानी करने ते मुकामी समुदायें खास करियें पारम्परिक तौर पर जंगलें च रौहने आहले समुदाय दे लोकें कन्नै खरे सरबंध बनाने लेई आखेआ। राणा हौरें कल सिविल सचिवालय जम्मू च मैहकमे दे अधिकारियें कन्नै लग्गी दी मीटिंग च एह गल्ल आकखी।

<><><><><><>

Goa-film Festival

सूचना ते प्रसारण मंत्रालय राष्ट्रीय फिल्म विकास निगम ते गोवा दी मनोरंजन सोसायटी दे सहयोग कन्नै भारत दे 55में अंतरराष्ट्रीय फिल्मोत्सव दा सरिस्ता करने लेई पूरी चाल्ली तैयार ऐ जेहड़ा 20 कोला 28 नवंबर 2024 तगर पणजी च लग्गोग। आकाशवाणी दे जम्मू संवाददाता नै जानकारी दिती ऐ जे फिल्मोत्सव दा इस बरे दा थीम ऐ “युवा फिल्म निर्माता-भविक्ख इयै ऐ” ते इससै मंशा कन्नै इक पुरस्कार भारतीय फीचर फिल्में च डेब्यू यानि पैहली फिल्म करने आले निदेशक लेई रक्खेआ गेआ ऐ जेदे नै नमें युवा फिल्म निर्माताएं गी बढ़ावा थहोग। इस सम्मान च प्रमाण पत्र दे अलावा 5 लक्ख रपे दा नकद ईनाम बी दिता जाग। इस फिल्मोत्सव दे दौरान 81 मुख्खें दियां 180 फिल्मां दस्सियां जाडन। भारतीय फिल्म निर्माता आशुतोश गोवारिकर अंतरराष्ट्रीय न्याय मंडल दे अध्यक्ष होडन। इस फिल्मोत्सव च भारत दिएं चार महान हस्तिएं दे 100मीं बरे गंड दे मौके पर उनेंगी चेता कीता जाग जिंदे च महान

फिल्मनिर्माता निदेशक ते अदाकार राज कपूर, फिल्म निर्माता तपन सिन्हा, तेलुगु फिल्म स्टार एक्कीनेकी नागेश्वर राव ते गायक मोहम्मद रफी शामिल न।

<><><><><><>

UAE-TBI

भारतीय तम्बाकू बोर्ड विश्व तम्बाकू मध्य पूर्व च निर्यात दे प्रतिनिधिमंडल दा नेतृत्व करा करदा ऐ जेहदा रणनीतिक लक्ष्य करसाने दी औदन बधाने लेई अनियमित भारती तम्बाकू दी ब्रांडिंग पर ऐ। एह पैहले मध्य पूर्व दे बजारें लेई केंद्रित ऐ जेदे च संयुक्त अरब अमिरात इक्क प्राथमिक निर्यातक ऐ। भारतीय तम्बाकू उद्योग दऊं बक्ख-बक्ख निर्यात श्रेणिं तैहत कम्म करदा ऐ। पैहली श्रेणी च 226 निर्यातक न जेदे अनियमित तम्बाकू बाहरले मुखें च भेजदे न। जिसले जे दऊं श्रेणी च दर्ज 557 उत्पादक दर्ज न जेहड़े तम्बाकू कन्ने तैयार उत्पादे दा निर्यात करदे न। 2023-24 आले बरे दौरान भारत नै कोई 128 मुखें गी तम्बाकू ते तम्बाकू उत्पादे दा निर्यात कीता ऐ। भारतीय तम्बाकू बोर्ड तम्बाकू उत्पादन ते निर्यात दे नियमन दी दिक्ख-रिक्ख करदा ऐ।

<><><><><><>